

左恪靖侯奏稿續編

恪靖奏稿續編卷二十六目錄

北路官軍進剿大勝摺

官軍會剿獲勝簡敬臨深入致挫摺

遵 旨覆陳摺

東南路官軍剿回連勝摺

郭寶昌迅赴河防金運昌與劉松山合隊片

軍機大臣 字寄同治八年十一月初二日奉

上諭前據左宗棠奏稱黃鼎等軍獲勝甘省驛道疏通以楊世俊等營分路進剿並令黃鼎先赴蘭垣附近擇要安營此時北路情形計可粗定該大臣得以進規河州矣本日據穆圖善奏派員齎送總督關防前赴涇州軍營該大臣諒已在途祇受惟念蘭州爲根本重地該大臣接篆後於省城防剿一切事宜自係責無旁貸現在河州等處賊巢林立近逼省垣即使黃鼎各軍皆能繼進亦不可無人指授機宜穆圖善既卸督篆凡西路

軍情及地方應辦公事均覺呼應不靈該大臣能否卽由平涼親赴蘭州居中調度抑一時不克前進先行派人前往接辦或以接辦乏人仍留穆圖善暫駐省垣照料軍務俟到後再行交替該大臣酌度情形著於接奉此旨後迅速詳細奏聞以慰廑念近日各路軍情若何黃鼎等軍何時馳抵蘭州劉松山軍在北路辦理剿撫事宜能否漸次肅清仍著該大臣督飭在事將士相機掃蕩迅奏膚功將此由六百里諭令知之欽此

軍機大臣 字寄同治八年十一月十五日奉

上諭穆圖善奏查明靈州降回變亂大概情形請將殉
難文員優卹並暫委寶璽護理安肅道篆各摺片覽奏
均悉前據左宗棠金順奏劉松山收復靈州情形已降
旨將署靈州知州鍾蘭友代理知州尹泗等交部照例
議卹並因馬化澂有給馬三重等偽札情事又代陝回
甘言求撫前後兩歧殊難憑信諭令左宗棠嚴飭劉松
山等乘勝進兵相機妥辦該大臣務當懍遵前旨督率
劉松山等軍分別良莠勦撫兼施不得輕率收降致墮

詭計左宗棠計已進駐平涼能否馳赴蘭垣居中調度
仍著迅速具奏穆圖善蒞甘數載熟悉情形現在甯夏
防守緊要該將軍既已交卸督篆著將省城防剿事宜
布置妥協俟左宗棠到省或左宗棠派員接辦有人卽
赴甯夏本任以重職守所請來京陛見之處著勿庸議
所有穆圖善原部各軍均著左宗棠調遣甘軍餉項並
著該大臣均勻分撥以利師行毋得稍分畛域安肅道
員一缺穆圖善現據肅州鎮總兵陶生林稟請暫委四
品頂戴資型護理該員係已革知縣資望大輕恐不足

以勝任著左宗棠隨時察看如果不能稱職卽行另派
委員前往接署將此由五百里各諭令知之欽此

北路官軍進剿大勝摺

奏爲北路官軍進剿逆回攻克莊寨大獲勝仗據實詳
陳仰祈

聖鑒事竊劉松山一軍十月初七日剿賊獲勝大概情
形臣已於十月二十六日附片陳明其時僅據劉松山
緘告故戰狀不詳臣拜摺後於十一月初一日進駐平
涼續接劉松山牘稱九月二十九日克復靈州城池及
十月初二日連破里仁渠各寨賊益震懾馬化澂央總
兵胡昌會保其永不反覆並力保陝回誠心就撫劉松

山屬胡昌會飭馬化澗勒令陝回將馬械悉數呈繳去後訶秦渠南板橋馬家兩莊納家三寨丁家兩寨劉家灣子三莊馬家灣子四莊何家兩莊迤西蔡家橋莊蔡家四寨余家兩莊西南達金積堡村莊鱗次陝回麇聚其中人衆心雜投誠之議連日不決催繳馬械一味支吾劉松山以該回兇狡成性仍宜乘間痛勦懾服其心初六日四鼓傳令各營分三路布壘陣一由左進板橋一由右進蔡家橋自督中軍出板橋蔡家橋之間馬隊張兩翼伏左右兩路之旁穩駐勿動俟步兵破賊則飛

馬分道抄之部署既定各軍進抵渠南半里許賊巢角聲四起紛紛憑渠開放鎗礮提督何作霖軍功董福祥各營撲近渠邊鎗礮對轟流光電掣賊仍死拒不退劉松山察看水淺者及膝深者沒腰飛令道員劉錦棠提督蕭章開督軍搶過橋卡分枝由左右路晃水抄擊中軍步隊亦越渠撲之賊潰向東西兩路狂奔適提督余虎恩副都統雙壽馬隊風馳雨驟而夾截其歸路逆眾未及歸巢守巢之賊見官軍四集棄巢鼠竄爭出寨門西遁官軍乘勢奪門而入將大小莊寨三十餘處一律

蕩平巢賊有冒死逸出者有圍殺殆盡者餘黨經各路馬步四面兜剿合併西趨波浪渠一水前橫逆眾擁擠不前官軍火器環轟賊中人馬應聲而倒填積渠中渠水盡赤官軍緊蹙至金積堡外馬隊追過堡西敗賊西奔折而南向強家沙窩遁竄各軍卽分營壘紮金積堡東北四里何家莊板橋一帶劉松山卽移紮距金積堡十四里之劉家寨是役殺斃淹斃之賊約二千有奇生擒二百八十四名內有賊目馬福李逢春馬隆訊異斬之獲陝回老弱眷口六百餘名拔出漢民數百名均派

送靈州城交提督黃萬友妥爲安插奪騾馬九百餘頭
器械無算官軍陣亡員並勇丁十六名此十月初七日
官軍進剿逆回攻克莊寨大獲勝仗實在情形也是夜
馬化澂復央胡昌會來營乞撫復代陝回繳馬七十七
匹大小洋鎗十七枝長矛一百三十二桿其餘馬械隨
後呈繳劉松山勒限三日得之自後屢次催繳僅據馬
化澂代繳破壞軍械數百件疲瘦馬騾數百頭詞愈卑
而計愈狡陝回頭目馬鎮和余彥祿方懇收撫而陳林
馬長順則不願繳馬械如故維時雷正綰周蘭亭簡敵

臨張福齊各帶所部於十二日馳至逼渠築壘距金積堡遠者十餘里近者七八里胡昌會馬化澂力保峽回就撫藉稱該頭目及黨眾實因官軍剿敗衝散一時難於清繳馬械乞寬限時日悉數呈繳嗣陸續繳馬三百四十七匹鎗械八百十九件二十七等日續繳馬四百三十五匹器械二百五十一件劉松山以該逆人眾心雜若必全眾收撫恐輟需時又生別故因吳忠堡一帶甘回均已避匿金積堡所遺各堡已空令願就撫者呈造冊籍移居吳忠各堡悉繳馬械以便安插馬鎮

和於十月初一二日先移男婦二百餘名入吳忠堡其餘正待遷移而陳林之黨東彌回眾從中截阻馬鎮和黨夥之嗜亂成性及眷口已被官軍衝散者無所顧戀亦復頓前議互相阻撓各逆首不能禁也劉松山以輕率收撫必貽後患初三日飛緘雷正綰周蘭亭張福齊簡敬臨等各整隊會剿適金運昌所部已先數日由花馬池靈州馳至是日午刻約齊出隊行抵板橋各逆知官軍進剿由金積堡旁各堡塞吹角列隊紛紛抗拒劉松山屬金運昌率所部向金積堡西門進自分所部

爲三支提督蕭章開王秀棟李雲貴楊清源朱德開由
右道向金積堡之北道員劉錦棠提督尹興茂李占椿
喻執益曹義勝軍功董福祥張俊李雙良由左路向金
積堡之東提督陶定昇吳致中何生源出中路劉松山
自率提督譚拔萃周國勝李就山爲是陣相機策應馬
隊張左右翼斜出三路之旁逆回見官軍布陣更覓騎
賊雖飛奔向前步賊仍胸縮不進官軍馬步奮威衝擊
鎗礮甫止刃矛隊如牆繼進立斃悍賊數百賊大潰不
止官軍縱橫盪挾將金積堡正北東北西北賊貼村寨

二十餘處一律蕩平日暮收隊卽於金積堡北四里一帶安紮營壘計是役共斃賊約一千一二百名生擒一百三十餘名訊出逆口馬受元馬中吉正法軍前奪騾馬八百餘頭軍械無算此十一月初三日劉松山各軍會合金運昌一軍勦回獲勝情形也自是日以後雷正綰周蘭亭張福齊簡敬臨各軍皆如約會勦惟中隔金積堡陝甘各逆回又踞金積堡旁各堡寨湖渠環繞古地周數十里各軍聲息難以徑達故彼此戰事未能盡歸一致所有雷正綰等各軍戰狀另摺詳陳不復牽敘

以清眉目是夜有漢民自賊中逃出者稱各頭目議將
脊口輜重併歸金積堡東西各寨明日決一死戰劉松
山與金運昌商賊既肯來索戰當俟賊隊齊出再相勢
分布應之初四日巳刻金積堡東西各堡寨馬步賊始
傾巢而出步賊甫出半里卽止不前騎賊東西馳騁勢
仍驕甚劉松山飭馬隊四營當之遇賊撲近且戰且收
俟步賊漸前則各路奮起猛擊比各軍馬步五路分布
已定馬隊亦誘賊近前然後中軍吹號擂鼓各軍奮威
齊進賊勢不支紛紛敗潰五路馬步官軍乘勢衝殺斃

賊無算敗賊回竄各巢憑寨死拒其殿後者經各營掩殺濠內外死屍駢列日暮始收隊而還是役東西兩路共斃賊八九百名劉松山所部生擒八十二名獲戰馬二百數十匹員弁勇丁陣亡二十一名提督李雲貴左臂受鎗子傷譚上連右膀受鎗子傷弁丁受傷者一百一十三名此十一月初四日劉松山金運昌各軍獲勝情形也是夜訊生擒回逆知余彥祿左臂已帶子傷悍賊傷亡不少擬卽乘勝會剿迅期蕝事而連日朔風甚勁沙塵大起咫尺莫辨不能出隊初七日風稍定劉松

山會商金運昌出隊斃賊約四五百名生擒六十餘名
奪獲戰馬一百六十餘匹弁丁陣亡十一名受傷六十
五名劉松山以賊圍死守擬再移營逼之初八日一面
出隊一面築壘賊拌死來爭官軍護修新壘分隊轟擊
斃賊三四百名生擒數十名弁丁陣亡者七名受傷者
四十六名是夜賊徒巢金積堡東西各堡以避官軍東
路賊勢加增復就波浪渠堰修築長牆一道橫寬約三
里劉松山既約南路西路諸軍初九日會剿黎明會商
金運昌出隊賊憑牆排列意圖死拒劉松山商令金運

昌率所部卓勝軍西進飭蕭章開等率所部出卓勝軍
之左劉錦棠等各率所部由左路進朱德開等各率所
部由右路進劉松山率陶定昇易致中何作霖周國勝
由中路均向波浪渠長牆進飭譚拔萃等率所部頓於
陣後相機策應飭余虎恩等率馬隊五營斜出劉錦棠
之左雙壽花良阿等率吉林馬隊斜出朱德開之右賊
見官軍數路整隊向長牆齊進騎賊皆下馬與步賊憑
牆列隊官軍奮攻半時鎗礮雷轟噴筒火箭並注賊中
傷斃已多猶死拒不退劉松山飛飭董福祥余虎恩等

馬步各營繞東而西突出卡後賊勢始亂各路馬步乘勢齊撲立將長牆一律踏平賊敗竄金積堡旁禮拜寺官軍躡踪緊追忽大風捲地塵沙驟起敗賊復傍寺列隊回拒而金積堡北又出賊一股均七八百循牆而來似圖截官軍之後劉松山令朱德開李就山馳擊敗之賊仍向正路敗走官軍各路愈戰愈奮鎗礮止刀矛接賊旋卻旋前者七八次均爲官軍所敗始棄巢而奔遂將禮拜寺攻破賊敗入寨時交申刻風勢更緊乃收隊而還計是役攻破長牆回寺陣斬賊七八百名轟斃

轟傷者一千數百名奪獲馬騾二百數十匹鎗機千餘
件生擒百餘名訊出賊目馬九林陳萬得兩名一併正
法員弁勇丁陣亡二十七名提督易致中左眼角受鎗
子傷子從口內出軍功董福祥右肱肘被鎗子洞穿弁
丁受傷者一百八十二名是日雷正綰周蘭亭張福齊
簡敬臨均力戰獲勝簡敬臨銳欲與劉松山合隊率所
部隊伍繞波浪湖旁金積堡及各寨穿過致敗劉松山
時已收隊回營不及知也初十日辰刻劉松山令陳宗
蕃由南路赴西路各軍計事晤幫辦簡敬臨營務廣東

高州鎮總兵徐文秀知之回馬飛報劉松山駭悼不已
立即撥三營移駐金積堡東北波浪湖尾一面緘商雷
正綰周蘭亭張福齊出隊會剿十一日劉松山與金運
昌仍分兩面出隊劉松山親率五營馬隊馳赴金積堡
東南簡敬臨營盤所駐漢伯堡適雷正綰亦到晤商一
切詎賊偵知劉松山赴漢伯堡突出騎賊千數百遮截
歸路劉松山當卽督隊馳回騎賊數十團猛撲近前勢
甚兇悍劉松山指揮迎擊正鏖戰時劉錦棠蕭章開瞭
見督馬步各隊由南路橫截而出賊卽潰走劉松山追

至各寨邊擒斬悍賊百餘名奪獲戰馬七十餘匹收隊
回營十二日賊伏巢不出是夜西南兩面悍賊麇聚東
面取磚石修砌長牆自金積堡外壕迤而東約長三里
又迤而南至波浪湖汊里許以拒官軍十三日劉松山
飭各營出隊擊之賊憑牆隱抗鎗石紛如雨注官軍馬
步五路齊進劈山洋鎗噴筒火箭次第齊施賊中死傷
已多猶隔牆挺矛對刺官軍見其鎗子磚石漸稀卽鼓
勇齊登或躡身躍入或掘毀牆身從缺口搶入賊勢不
支紛向各寨敗遁官軍壓追至寨旁寨門未啟賊皆依

寨拼死回拒寨上開鎗擲石助之官軍奮威衝殺前者帶傷後者繼進鏖戰兩時斃悍賊無算賊紛向金積堡南敗走一枝敗向堡東壕內官軍蹣踪掩殺壕內外賊屍枕籍日暮收隊是役共斃賊一千六七百名轟傷刺傷之賊約二千數百名生擒一百五十四名內有逆目馬辛馮標郭阿忻等數名訊知僞元帥沙學德已於牆破時轟斃矣奪獲戰馬二百三十餘匹旗幟千餘件記名提督李就山帶隊衝入賊中胷膺受礮子傷立殞於陣提督朱德開右膀受鎗子傷軍功張萬會右肩受抬

鎗子傷弁丁受傷者二百四十六名陣亡者三十八名
此十一月十三日以前官軍叠獲勝仗實在情形也臣
維陝回陳林馬鎮和余彥祿等自打拉池擊敗折回金
積堡時悍賊不過數千老弱婦女不計其數馬化澂代
爲求撫而不悉繳馬械其包藏禍心可知經劉松山雷
正綰及各軍叠次猛剿斃賊多矣而賊數不減反增於
前金積吳忠爲靈州西南著名兩大堡吳忠堡雖早廢
而環吳忠二三十里堡寨土人皆呼爲吳忠堡金積堡
亦然環金積各堡寨亦呼爲金積堡劉松山叠將吳忠

各堡寨攻毀略盡卽金積堡北而一帶各堡寨亦已掃蕩一空見存者惟東西十數堡而已陝回敗蹙併入金積東西各堡與甘回雜居其豫望韋州各堡甘回曾經官軍擊敗者從而附之馬化澂又時嗾堡中回逆於夜間潛入東西各堡助逆賊數之所以已耗而旋增者以此陝回於屢敗之後意本求撫其喪失眷口之賊以無所繫戀仍思乘冰橋北竄效捻逆故智因阻馬械不繳賊中所呼乾馬隊者也馬化澂資以糧糗鎗礮嗾其死抗官軍又一面稟知官軍陝回不悉繳馬械請急擊之

賊勢之所以已窮而仍悍者以此現在冰凍早合北竄一著本屬可虞諸軍正悉力北面並咨商金順張曜嚴密巡防矣而近察賊情亦有難於北竄者有眷屬之回不肯他竄者多無眷屬之回以疊負重傷不能他竄者亦多也金積堡糧料雖多而秣馬之草無從採取近據賊中逃出漢民均稱賊之騾駝馬匹餓斃者已三分之一羣相怨懟無可如何其勢實亦衰蹙特因獸猶鬪攻堅費人不敢不慎以圖之耳劉松山一軍各戰陣亡之頭品頂戴記名提督法福凌阿巴圖魯李就山從征十

載戰必身先由東南而西北勦平髮逆擒逆卓著戰功
此次因炮子穿胷立殞陣前實堪悼惜之至應懇
天恩飭部照提督陣亡例議給

卹典並請

予諡以彰忠烈提督銜記名總兵周本立記名總兵易
作義儘先副將溫其林補用參將李必貴補用遊擊王
順明盛德林張勝魁廖得英楊寶玉陳芝蘭補用都司
萬友山葉宜恭楊俊發都司銜守備謝春和拔補守備
朱鳳翔拔補千總譚連城王義勝李金山拔補把總劉

萬勝劉得照軍功擬保把總楊復盛均衝鋒陷陣血戰捐軀應懇

天恩飭部各照所保官階議給

卹典以慰忠魂所有北路劉松山各軍勦回疊獲大勝實在情形謹會同幫辦陝甘軍務署陝西撫臣劉典恭摺馳報伏乞

皇太后

皇上聖鑒訓示施行謹

奏
同治八年十一月二十日

同治八年十二月初八日內閣奉

上諭左宗棠奏北路官軍進剿逆回攻克莊寨大獲勝
仗請將陣亡各員分別議卹予諡一摺陝西逆回經劉
松山擊敗後遁入馬家納家等莊寨詭詞乞撫劉松山
督軍分路進剿越渠抄擊賊眾大敗爭奪寨門西遁官
軍乘勢衝入將大小莊寨三十餘處一律蕩平逆酋馬
化隆復赴營求撫呈繳馬匹軍械劉松山察其心志未
齊復會同雷正綰等各率所部分路向金積堡進攻馬
步衝擊立斃悍賊數百名賊眾奔潰官軍將附近金積

堡各村寨二十餘處悉數剿洗逆回復出隊抵死決戰
劉松山等督軍迎剿賊勢不支紛紛敗走各路官軍乘
勢衝殺斃賊無算逆眾徙巢以避並憑渠築牆復經劉
松山等督兵踏平該回眾敗竄金積堡旁禮拜寺又經
官軍攻破該逆磨聚金積堡東面憑牆抗拒馬步官軍
鼓勇齊進回眾均向各寨敗遁現在吳忠各堡寨攻毀
略盡金積堡北面各堡寨亦一律掃蕩剿辦尙屬得手
著左宗棠仍飭劉松山等軍將金積東西各堡迅速攻
拔毋留餘孽所有頭品頂戴記名提督李就山剿平髮

總各逆卓著戰功茲因中礮陣亡殊堪憫惜李就山著
交部照提督陣亡例議卹並加恩予諡以彰忠烈提督
銜記名總兵周本立記名總兵易作義副將溫其林參
將李必貴游擊王順明盛德林張勝魁廖得英楊寶玉
陳芝蘭都司萬友山葉宜基楊俊發都司銜守備謝春
和拔補守備朱鳳祥拔補千總譚連城王義勝李金山
拔補把總劉萬勝劉得照軍功擬保把總楊復盛均著
交部照擬保官階議卹欽此

官軍會剿獲勝簡敬臨深入致挫摺

奏爲官軍會剿逆回疊獲勝仗簡敬臨一軍勝後深入
致挫現籌辦理情形謹據實馳陳仰祈

聖鑒事竊陝西提督雷正綰題奏提督周蘭亭提督銜
前衢州鎮總兵簡敬臨提督銜記名總兵張福齊各軍
於十月十二日進駐金積堡西南秦渠一帶臣飭勦撫
機宜均候劉松山商定酌度以一事權疊據雷正綰等
牘呈連接劉松山緘稱各回目央求收撫惟人多心雜
現正勒令悉數呈繳馬械馬化澄再四懇請寬限且宜
按兵勿動待之十一月初二日劉松山緘約次日會剿

雷正綰周蘭亭張福齊初三日午刻三路齊進所過回
堡次第搜捕隨結方陣進至平川賊萬餘憑金積堡壕
邊穩抗簡敬臨率所部六成隊逕抵金積堡東南里許
賊正與湘軍接仗不虞簡敬臨自後突至嚇賊分拒簡
敬臨從賊巢穿入立將賊巢踏毀斃賊數百生擒十餘
名正擬收隊適劉松山已將北路賊寨蕩平移營逼寨
敗賊由東路向南猛撲簡敬臨且戰且收以鎗礮列後
轟擊斃騎賊數十而還初四日辰刻各軍整隊以待已
刻接劉松山緘約進剿雷正綰周蘭亭張福齊西三面

三路齊進派隊留守長壕賊分途抗拒官軍三路衝殺斃悍賊百餘名賊不能支追至三道壕邊敗賊合守賊萬餘憑壕死拒官軍調劈山礮洋鎗各隊指定轟擊壕內外之賊應聲而倒紛向西門敗竄各軍躡蹤緊追斃賊無數立將村外帳棚一概焚毀追至金積堡城西北賊仍回頭抗拒片股騎賊復自北門繞出西路冀抄官軍之後各軍復排鎗礮連環轟擊其留守長壕各營亦派隊截擊賊仍敗退壕內其計斃賊約數百名受傷者千餘官軍受傷者數十名陣亡者數名簡放臨是日聞

北路礮聲甚緊卽令各營堅守長壕親率各營大成隊
出擊比抵金積堡邊騎賊從兩旁抄出步賊拚死猛撲
簡敬臨飭各營密結方陣俟賊撲近始層開鎗礮轟之
賊撲愈近死傷比各處戰兩時聞北路礮聲已歇正擬
連環收隊忽各堡出騎賊千餘步賊三四千四面擁至
簡敬臨與營哨各官均下馬親率刀矛隊從鎗礮隊中
衝殺而出當者辟易總兵蕭寶林左膀受矛傷穿透升
用提督姚連陞左肩受矛傷裏創力戰刀矛隊愈戰愈
奮立斃呂先悍賊數十名乘勢掩殺陣斬賊百餘名生

擒十餘名賊始敗潰日暮收隊而還計共斃賊數百名
傷賊不計其數而勇丁之陣亡者二十一名受傷者八
十七名營官受傷者二員哨官受傷者五員蓋血戰也
連日大風揚沙不能出隊初八日晡風色稍定初九日
卯刻接劉松山信約會出隊辰刻東北礮聲大震雷正
綰周蘭亭張福齊各率所部齊抵渠邊遙見賊勢趨重
西路各軍整隊迎擊均結方陣鎗礮刀矛勻布四面進
至二道渠賊憑渠抗據官軍奮威衝殺賊紛紛敗退追
至三道渠甫令收隊忽片股騎步各賊狂奔而來又一

股從東北馳至雷正綰周蘭亭張福齊復回旗堵之總
兵趙玉亭周玉堂徐萬福副將楊美勝率礮隊自南路
側出截擊賊仍敗退官軍復追至三道渠收隊而還計
共斃賊數百名其簡敬臨一軍於初九日辰刻聞北路
礮聲甚緊卽率各營出隊馳抵金積堡東面遙見回逆
正與劉松山接仗催軍急進金積堡東門渠邊五營緊
結方陣步步進逼賊見官軍逼近騎賊從兩旁抄出步
賊拚死迎敵簡敬臨令各營整隊齊進鎗礮層疊刀矛
並舉斃賊不計其數是時北路面賊衆已經劉松山各

軍擊敗紛紛南竄簡敬臨銳圖衝過回巢與劉松山合
隊越過數堡將堡外賊棚一律焚毀維時南風大作塵
沙蔽天咫尺莫辨各廢堡礮子雨下簡敬臨指揮各營
仍結陣而前左臂已被礮子洞穿裹創復進營官譚正
明力請收隊簡敬臨以賊雖敗竄仍踞各廢堡如遂收
隊回營若廢堡中各賊儘力跟追翻難堵截仍令各營
併力向前衝殺正分布間忽飛礮中簡敬臨頭顱殞於
馬下各將并見主將墜馬紛馳援救陣腳稍亂騎賊數
千遂乘虛突入中營將弁傷亡甚眾左營營官姚連陞

右營營官譚正明見中營有失急策馬率隊馳援皆爲
堡中礮子中傷步賊復叢矛攢刺譚正南陣亡姚連陞
用矛連斃騎賊數人相繼殞命幫辦營務廣東高州鎮
總兵徐文秀督中後兩營併力衝殺斃賊多名突圍而
出連環收隊回營急令分守各壘一面飛報西路各軍
派隊速援比賊眾麇至則壘中守具亦略有布置矣賊
毀長壕拔花籬地刺而入去壘邊一數丈壘中鎗礮頻
施賊旋卻退悉踞壘前廢堡中徐文秀頻用開花礮向
廢堡中一面轟擊但聞人馬沸騰聲計斃賊亦不少矣

二鼓張福齊派總兵徐萬福周蘭亭派總兵趙玉亭各率所部由油麻湖踏冰而過號聲不絕四鼓到營賊已遁去初十日黎明雷正綰張福齊率各營至會商出隊進至金積堡東門渠邊賊眾蜂擁而來雷正綰戰馬受傷韁亦擊斷乃下馬揮刀督陣鎗礮環施賊冒死衝撲數次均經擊退騎賊數千復由左右抄出陣後張福齊令各營排劈山礮飽以羣子俟賊近轟之每礮必傷數賊數馬賊始敗竄官軍結隊緊追直抵金積堡日暮收隊而還十一日雷正綰等與劉松山約出隊會剿辰刻

出隊東門渠邊遙見劉松山所部已與賊接仗張福齊
麾軍前進雷正綰整隊繼之將近賊巢賊分投死拒鎗
子如雨官軍間有傷亡雷正綰張福齊督令前進劉松
山馬步各營亦由東路猛撲而來賊始敗退十二日雷
正綰等與劉松山會商布置後收隊回防仍與張福齊
周蘭亭各留隊伍駐中營助守是日劉松山歸途遇賊
接仗獲勝十三日劉松山各軍大獲勝仗已於另摺陳
明雷正綰周蘭亭亦於是日會勦獲勝尙未接其文報
十三夜黃河水長渠流漾滿官軍與賊隔絕不能出隊

數日內尙無戰事當俟水漸涸退乃議會剿臣聞簡敬
臨初九日之失飛致劉松山派馬步數營填紮原壘緣
簡敬臨駐營之處近漢伯堡地在金積堡東南踞劉松
山北路各營雖止十五六里中隔波浪湖難於聯絡又
彼此出隊必由各回堡寨穿過地逼寨多防不勝防現
在催辦糧運節節轉輸一俟軍糧稍裕再派數營前往
以資厚集簡敬臨自咸豐十年隨臣征剿江西安徽浙
江福建廣東積功淳擢提督銜總兵計已受重傷十餘
次前蒙

恩補授浙江衢州鎮總兵因傷殘已甚懇請代陳乞

恩開缺嗣以臣西征甚急復募勇丁前來轉戰而前壯
懷彌厲李旺堡穆家潭之戰擒斬逆首楊文治蒙

賞加頭品頂戴感激思奮遂以身殉合無仰懇

天恩飭將頭品頂戴提督銜前衢州鎮總兵鏗僧額巴
圖魯簡敬臨照提督陣亡例議給

卹典並懇

予諡以存其人升用提督果勇巴圖魯姚連陞由勇丁
隨征積功洊擢今職驍勇超羣秉性忠諒初四日之戰

受傷時親兵負之以趨因見簡敬臨陣亡誼不獨生遂叱親兵速去跌坐以死其志節凜然有如此者應懇

大恩予諡卹

飭部照提督陣亡例議給

卹典提督銜記名總兵譚正明補用總兵鄧雲高副將秦龍瑞羅榮貴參將宋維朗晏發貴徐有錫王致清彭鼎升賢游擊熊在新陳有忠顏友源李忠信侯澤順皮二喜周海庭都司劉固明丁雲祥胡玉發王喜章守備陳祖耀均縱橫血戰力竭捐軀應懇

天恩飭部均照所保官階議給

卹典以妥忠魂所有各軍勝負實在情形及布置大略
謹據實馳陳伏乞

皇太后

皇上聖鑒訓示施行謹

奏

同治八年十一月三十日

同治八年十二月初八日內閣奉

上諭左宗棠奏官軍會剿回逆獲勝請將陣亡各員分
別議卹予諭一摺提督雷正綰等約會提督劉松山分

別達勒金積堡回逆十一月初三初四等日雷正綰周
蘭亭張福齊備散臨各軍迭次分投進攻該逆聚眾踞
守金積堡長壕恃險抗拒各軍環壕鏖戰先後斃賊數
百名及數十名不等劉松山一軍亦將北路賊寨平毀
初九日雷正綰等復督師會攻斃賊數百名簡敬臨率
軍馳抵金積堡東面整隊擊賊施放鎗礮轟斃多名遙
見北面賊眾經劉松山擊敗南竄乘勢衝過回巢欲與
劉松山合隊越賊堡數處中礮陣亡營官姚連陞等亦
同沒於陣十二三等日雷正綰劉松山等軍擊賊迭

獲勝仗仍著左宗棠激勵將士厚進勁軍將金積堡等處逆匪妥速殲除毋留餘孽陣亡之提督銜前浙江衢州鎮總兵簡敬臨升用提督姚連陞均著交部照提督陣亡例議卹並加恩予諡提督銜記名總兵譚正明補用總兵鄧雲龍副將秦龍瑞羅重貴參將宋維朗吳發貴徐有錫均著交部照記名總兵例議卹並加恩予諡提督銜記名總兵譚正明補用總兵鄧雲龍副將秦龍瑞羅重貴參將宋維朗吳發貴徐有錫均著交部照記名總兵例議卹並加恩予諡

李忠信候澤順皮二喜周海庭都司劉固明丁雲祥胡王發王喜章守備陳祖耀均著交部各照所保官階議卹欽此

遵

旨覆陳摺

奏爲遵

旨覆陳仰祈

聖鑒事竊臣於同治八年十一月初九日欽奉十一月

初二日

諭旨蘭州爲根本重地該大臣接篆後於省城防剿一切事宜自係責無旁貸現在河州等處賊巢林立近逼省垣卽使黃鼎各軍皆能繼進亦不可無人指授機宜該大臣能否卽由平涼親赴蘭州居中調度抑一時不

克前進先行派人前往接辦或以接辦乏人仍留穆圖
善暫駐省垣照料軍務並續奉

諭旨該大臣現擬進駐平涼著卽懷遵前旨將能否馳
赴蘭垣情形迅速具奏等因欽此

臣維十月二十五日

涇州營次准前署督

臣

穆圖善咨稱蘭州省垣及西路

甘涼肅三郡距涇較遠現雖交卸督篆如關緊要軍務

擬隨時權宜辦理另刊甯夏將軍木質關防鈐用具

奏等語比因北路軍情正在剿撫未定之際

臣

接篆後

由涇州前進止可暫駐平涼布置中路聯絡南路策應

北路仍可控制西路若徑駐蘭州設北路逆回被剿橫
湟東路不惟劉松山雷正綰周蘭亭張福齊徐文秀各
軍無所稟承卽涇平赴蘭州駟道必致阻梗於秦隴大
局均有妨礙查督垣城關內外及金縣防兵不下三十
餘營近又環掘長壕進攻雖或不足自守似尙有餘臣
比咨請穆圖善督同在省司道就現有兵力保衛省垣
又撥過餉銀十七萬兩准穆圖善繳稱軍心大定其地
方日出公事責成藩司崇保代拆代行遇有緊要之件
隨時包封遞送臣等核辦現在道員黃鼎提督張曾元

楊世俊副將崇志馬步各軍分布隆德靜甯會甯安定
一帶蘭垣聲息已通其西通陝回由狄道折竄清水駟
大營川甘草店者均經各軍擊敗歸集省城根本之地
自明穩固接穆圖善來緘從前嫌疑盡釋似與臣尙無
介蒂臣入平涼以來籌軍食賑灾黎撫良同辦游匪力
顧後路轉輸以重中路樞紐現飭三品頂戴甘肅卽補
道蕭守幹西甯鎮總兵黃武賢由蘭州赴秦望川涼州
一帶會同總兵王仁和料理屯政安插石成器一股一
俟北路局勢粗定南路裁併各營均有頭緒臣卽督奉

親軍鼓行而西爲進擣河州計屆時察看情形權衡緩急再將進止機宜詳細奏

聞是否如斯伏候

訓示理合恭摺據實馳陳伏乞

皇太后

皇上聖鑒施行謹

奏

同治八年十一月三十日

東南路官軍剿回連勝摺

奏爲東南各路官軍截剿竄回連獲勝仗恭摺馳陳仰

祈

聖鑒事竊陝回西竄經官軍進剿獲勝情形臣已於十月十九日馳報其時記名提督楊世俊升用提督徐占彪馬步各營分防安定紅土窪地方調陝回自十月初三日敗遁狄道逆目崔三竄過洮河踞狄西三十里之雅哈川糾河州逆目馬榮大馬占魁馬石等北竄揚言救援金積堡分股結寨隴西屬之固城十家莊蔣家坪乘虛掠食覬覦南路十月十九日二鼓各營蓐食急進徐占彪步隊循馬家河出固城之西楊世俊馬隊由麻

平川出固城之南五鼓齊抵賊巢馬隊張左右翼拒卜
家莊蔣家坪援賊步隊直薄堡下賊驚覺憑堡抗敵鎗
礮對轟楊世俊察看堡牆高聳外環深壕欲圖進攻騎
不如步遂令軍士下馬合力攻其西面賊見官軍勢盛
悉眾禦之壯士踰壕拊其背猱升而上立拔堡城守賊
二百餘名無跳免者天明卜家莊蔣家坪援賊蜂至不
虞官軍已入固城比其漸來漸近官軍從堡中躍馬陣
戈而出乘勝猛擊之賊駢而奔各營馬步縱追十八里
至春家掌餘逆向西南逸去後收隊回固城休息漏已

三下矣是役斃賊八九百名生擒十九名訊出賊目馬文一名斬之獲牲畜三百餘頭官軍傷亡勇丁四名此十月十九日楊世俊徐占彪勦賊獲勝實在情形也二十日各營自固城回防諜報崔三李經舉禹得彥大股八九千眾由狄道竄踞清水驛甘草店大營川蔓延金家崖楊世俊調集所部馬隊並約徐占彪出紅土窰道員李耀南出馬營監率師合剿二十一日午刻楊世俊徐占彪馬步齊至嶢口令各營薄暮傳餐潛師夜起分道襲賊營以火箭爲號行抵車道嶺步隊由中路出甘

草店馬隊循車道嶺山脊出清水驛四鼓馬步各路齊
抵賊巢號鼓齊鳴甘草店之賊始自夢中驚起料號亂
竄官軍已於月色微茫中鎗礮連環轟擊夾以刀矛遇
賊卽斫天明追賊入大營川悍賊列隊居前翼蔽羸弱
冒死拚拒楊世俊率精騎斜抄賊後邀其歸路賊返顧
慌亂各營馬步乘之踏毀賊巢數十處賊棄輜重器械
折由站灘黃石坪遁狹道馬隊蹣追五十餘里玉新營
水家坡沿途賊屍枕藉日暮乃收隊回大營川就地爲
壘戍刻偵東路逆騎數百竄近巉口楊世俊徐占彪於

二十三日五鼓整隊東向天明抵嶠口賊之步騎已於
先夜偷過向狄道西奔矣維特李耀南所部亦至各軍
分道窮追馬隊沿杆鉤驛疾馳好麥川緊蹙賊蹤步隊
繼之四路抄擊竄賊數百一律聚殲得逸出者僅十餘
騎而已訊據擒賊何畢梁禹三兒楊文德張九兒供稱
此股乃馬生彥之弟馬生定及白彥虎之黨葉曾正護
賊眷西竄緣九月十九日打拉城大敗後避匿荒谷晝
伏夜動循郭城驛野蜜川魯家溝繞嶠口西原而過不
料官軍條至也馬生定葉曾正已均經官軍陣斬訊畢

正法軍前總計是役斃賊一千六七百名獲驃馬七百餘頭器械無算此十月二十一二三等曰楊世俊徐占彪等各軍勦賊獲勝情形也陝回已由狄道而竄圖入河州合夥而河州逆回畏官軍進勦被其連累固拒不納陝回向河回買糧河回故高其價每斗四十斤索價銀四五兩陝回之食分黨肆掠紅土窩迤西三十里之石家岔王家堡侵及麻子川等處楊世俊派馬隊自紅土窩馳擊李耀南白馬營監派步隊輔之二十九日四鼓各營馬步齊集紅土窩鼓行而西黎明遇賊騎千餘

於王家堡閭浙補用副將盛照魁步隊循南原乘高壓
下提督銜江西補用總兵蕭寶謙步隊循西川兜剿而
前提督張仲春參將楊德俊馬隊分枝斜抄賊之左右
陣斬悍賊二三百名該逆向西北越溝鼠竄各營馬步
追殺六十餘里始收隊而還十一月初一日午刻楊世
俊調賊騎千餘圍攻安定縣西五十里細水岔田家窪
民堡約徐占彪乘夜襲之派馬隊預伏內官營截賊歸
路初二日四鼓各營齊抵細水岔乘賊不備掩之分枝
圍田家窪賊巢堡牆聲時該逆列隊死拒鎗礮對轟總

兵陳春萬立馬當先面中又子鎗傷勇丁楊化熊麾旗
猛進中礮而殞天明適徐占彪楊世俊掃蕩細水岔賊
巢而來飭馬隊下馬環攻洋鎗洋礮測準轟擊賊勢恟
懼壯士一鼓齊登立毀其巢餘眾奪門向西南狂竄瞥
見內官營塵起知張仲春楊德俊馬隊亦到各營乘機
夾擊截殺數百名追至站灘收隊而還兩戰共斃賊千
餘名擒七八十名分別斬釋奪騾馬千餘頭官軍升勇
傷亡四名此十月二十八日十一月初二日楊世俊徐
占彪李耀南各軍剿賊獲勝情形也王家堡之戰生擒

賊目馬環部供陝西大荔縣回民黨眾皆東彌悍賊田
家廩之戰據擒賊供稱是陝回零股糾合狄道逆回由
渭源竄來圍犯東路牽綴官軍者逆日馬油布當經陣
斬矣初九日調賊馬步千餘由大寨子趨通安驛並踞
楊坡店石家岔一帶踞通渭屬紅土窰三十里楊世俊
飭張仲春楊德俊卽夜出隊會李耀南剿之四鼓馳抵
楊坡店石家岔李耀南督所部輔營及平江三營同至
彼此分途掩擊共斃賊三百餘名奪獲騾馬百餘匹鎗
械數百件此十一月初十日各軍截剿獲勝情形也臣

維南窺陝回除崔三禹得彥兩股外尙有白彥虎馬生
彥等黨眾人數雖多能戰之賊不過數千惟河狄逆回
及南路各逆回雖難其間人數多少尙難懸擬然北不
能遏通金積堡之援西不能遏合河州之勢窮蹙可知
正宜斷其紛竄大舉圖之現飭周開錫將南路諸軍核
實歸併分布鞏秦一帶儲軍食作士氣遏其東趨飭黃
鼎揚世俊等馬步各軍一面採運糧料一面雕勦回土
零匪以免牽綴一俟北路局勢相定卽從中路壓勦而
前期收節節肅清實效所有此次中路南路期回獲勝

在事之員弁勇丁可否由下等員案酌保以示鼓勵之處出自

天恩謹會同幫辦陝甘軍務署陝西巡撫臣劉典合詞
馳陳伏乞

皇太后

皇上聖鑒訓示施行謹

奏
同治八年十一月三十日

郭寶昌赴河防金運昌與劉松山合隊片

再臣於同治八年十一月初四日欽奉十月二十六日

寄諭刻下黃河冰結山西河防更爲緊要該大臣既以李慶親爲不足恃則郭寶昌赴晉之行尤不可緩著卽檄飭該提督酌帶親兵迅赴山西金運昌已督軍抵甯條梁並酌飭令迅速前進與劉松山軍會堵賊氛毋稍濡滯等因欽此臣先於十一月初二日據郭寶昌十月十五日稟稱前隊已抵安邊堡糧運甚艱該提督須暫駐紮德料理糧運等情臣當卽飛飭該提督旣未前進則紮德距晉甚近應卽欽遵

諭旨酌帶親兵迅赴山西河防茲奉

寄諭又恭錄飛檄道照鉅飭金運昌迅速進兵據道員
曾傳理十月二十九日自金積堡沙窩緘報則云金運
昌軍已與劉松山合隊矣尚未據該提督等稟報其到
防各日期情形容續報謹附片具陳伏乞

聖鑒謹

奏 同治八年十一月三十日

軍機大臣 字寄同治八年十二月初八日奉

上諭左宗棠穆圖善奏東南各路官軍剿回疊勝左宗
棠奏遵旨復陳各一回略奏均悉提督楊世俊等軍將

陝回擊敗西竄自十月十九日至十一月初十日在固
城清水驛紅土窖等處分軍進剿殺賊甚多並生擒賊
目正法其分擾東路之逆目馬油布亦經陣斬現在各
逆窮蹙北不能進金積堡之援西不能與河州連合左
宗棠等已令周開錫將南路諸軍聚實歸併分布鞏秦
一帶並令黃鼎等軍雕剿回土零匪卽著檄飭各該將
領偵探賊蹤痛加剿洗一俟北路粗定卽由中路掃蕩
而前毋稍鬆勁此次在事出力員弁勇丁准其彙案請
保左宗棠現在駐軍平涼策應各路並派黃鼎等分布

隆德靜寧會同安定一帶雖與蘭州聲息相通而會垣
防守事宜亦不可稍形疎懈穆圖善著懷遵前旨暫駐
省城就現有兵力督同司道各官妥籌保衛左宗棠仍
當隨時兼顧其石成器一股卽著飭令蕭宗幹等會同
王仁和妥爲安插並將秦望川等處屯政趕緊料理北
路之劉松山等軍亟著催令前進以期節節疎通河州
爲甘回負固之區必須破此巨巢方可迎刃而解著左
宗棠察看情形如兵力足敷勦辦卽行督軍前進以竟
全功將此由六百里各諭令知之欽此